

四庫全書

集部

欽定四庫全書

集部
東漢文紀卷七

詳校官庶吉士_臣陳若霖

主事銜_臣徐以坤復勘

總校官進士_臣楊懋珩

校對官中書_臣孫球

謄錄監生_臣李炎

欽定四庫全書

東漢文紀卷七

明梅鼎祚編

伏湛

字惠公琅邪東武人更始時為平原太守光武知湛名儒舊臣徵拜尚書典定舊制封陽

都侯歷
大司徒

移書屬縣

湛更始時為平原太守時尚兵亂郡中驚擾湛移書屬縣於是吏民信嚮

遠近
獨完

屬縣不得相侵凌天生蒸民必為立君非久亂也且養

老育幼以待真主

後漢
紀

諫光武親征漁陽疏

湛建武三年為大司徒時彭寵反於漁陽帝欲自征

之湛疏

諫乃止

臣聞文王受命而征伐五國必先詢之同姓然後謀於羣臣加占著龜以定行事故謀則成卜則吉戰則勝其詩曰帝謂文王詢爾仇方同爾兄弟以爾鉤援與爾臨衝以伐崇墉崇國城守先退後伐所以重人命俟時而動故參分天下而有其二陛下承大亂之極受命而帝興明祖宗出入四年而滅檀鄉制五校降銅馬破赤眉

誅鄧奉之屬不為無功今京師空匱資用不足未能服
近而先事邊外且漁陽之地逼接北狄黠虜困迫必求
其助又今所過縣邑尤為困乏種麥之家多在城郭聞
官兵將至當已收之矣大軍遠涉二千餘里士馬罷勞
轉糧艱阻今兗豫青冀中國之都寇賊縱橫未及從化
漁陽以東本備邊塞地接外虜貢稅微薄安平之時尚
資內郡况今荒耗豈足先圖而陛下捨近務遠棄易求
難四方疑怪百姓恐懼誠臣之所惑也伏願遠覽文王

重兵博謀近思征伐前後之宜顧問有司使極愚誠采

其所長擇之聖慮以中土為憂念

東觀漢記臣聞文王享國五十伐崇七年

而三分天下有二至武王四海乃賓

伏隆

字伯文湛子厯光祿大夫死於張步

移告青徐二州檄

時張步兄弟據有齊地拜隆為太中大夫使青徐二州招

降郡國隆移檄告羣盜皆降步遣使隨隆詣闕復拜隆光祿大夫復使於步拜步為東萊

太守會劉永亦立步為齊王步遂執隆受永封隆遣間使上書帝示其父湛曰隆可謂有

蘇武之節步竟殺之

乃者猾臣王莽殺帝盜位宗室興兵除亂誅莽故羣下
推立聖公以主宗廟而任用賊臣殺戮賢良三王作亂
盜賊從橫忤逆天心卒為赤眉所害皇天祐漢聖哲應
期陛下神武奮發以少制衆故尋邑以百萬之軍潰散
於昆陽王郎以全趙之師土崩於邯鄲大彤高胡望旗
消靡鐵脰五校莫不摧破梁王劉永幸以宗室屬籍爵
為侯王不知厭足自求禍棄遂封爵牧守造為詐逆今
虎牙大將軍屯營十萬已拔睢陽劉永奔迸家已族矣

此諸君所聞也不先自圖雖悔何及

再使上書

臣隆奉使無狀受執凶逆雖在困阬授命不顧又吏人知步反畔心不附之願以時進兵無以臣隆為念臣隆得生到闕庭受誅有司此其大願若令沒身寇手以父母昆弟長累陛下陛下與皇后太子永享萬國與天無極

侯霸

字君房河南密人王莽敗為淮平大尹保全一郡建武初徵拜尚書令明習典故遷大司

徒

李通辭職議

光武之興也宛人李通布衣倡義助成大業封固始侯拜大司農通

上書稱病下公卿羣臣議大司徒侯霸等議上詔通勉致醫藥以時視事

王莽篡漢傾亂天下通懷伊呂蕭曹之謀建造大策扶
助神靈輔成聖德破家為國忘身奉主有扶危存亡之
義功德最高海內所聞通以天下平定謙讓辭位夫安
不忘危宜令通居職療疾欲就諸侯不可聽

劾朱浮奏

浮任幽州牧與彭寵構怨為寵所攻敗城降於寵霸為尚書令奏浮帝以

浮為執

金吾

浮敗亂幽州構成寵罪徒勞軍師不能死節罪當伏誅

鮑永

字君常上黨屯留人

劾趙王良奏

東觀記建武十一年永為司隸校尉趙王良帝叔父也時從送中郎

將來歛喪還入夏城中與五官將軍相逢道迫良怒台門候岑尊叩頭馬前永劾奏良

今月二十七日車駕臨故中郎將來歛喪還車駕過須臾趙王良從後到與右中郎將張邯相逢城門中道迫狹叱邯旋車又詔候岑尊詰責使前走數十步按良諸

侯藩臣蒙恩入侍知尊帝城門候吏六百石而肆意加怒令叩頭都道奔走馬頭前無藩臣之禮大不敬也

梁統

字仲寧安定烏氏人初與竇融起河西為武威太守歸漢封成義侯終九江太守定封陵

鄉

上光武論宜重刑書

統建武十二年與竇融以列侯奉朝請數陳便宜以

為法令既輕下姦不勝宜重刑罰以遵舊典乃上疏事下三公廷尉議以隆刑峻法非明

王急務今所定不宜開可統復上疏遂寢不報

臣竊見元哀二帝輕殊死之刑以一百二十三事手殺

人者減死一等自是以後著為常準故人輕犯法吏易
殺人臣聞立君之道仁義為主仁者愛人義者政理愛
人以除殘為務政理以去亂為心刑罰在衷無取於輕
是以五帝有流殛放殺之誅三王有大辟剕肌之法故
孔子稱仁者必有勇又曰理財正辭禁民為非曰義高
帝受命誅暴平蕩天下約令定律誠得其宜文帝寬惠
柔克遭世康平唯除省肉刑相坐之法它皆率由無革
舊章武帝值中國隆盛財力有餘征伐遠方軍役數興

豪傑犯禁姦吏弄法故重首匿之科著知從之律以破
朋黨以懲隱匿宣帝聰明正直摠御海內臣下奉憲無
所失墜因循先典天下稱理至哀平繼體而即位日淺
聽斷尚寡丞相王嘉輕為穿鑿虧除先帝舊約成律數
年之間百有餘事或不便於理或不厭民心謹表其尤
害於體者傳奏於左伏惟陛下包元履德權時撥亂功
踰文武德侔高皇誠不宜因循季末衰微之軌回神明
察考量得失宣詔有司詳擇其善定不易之典施無窮

之法天下幸甚

復上疏

有司以臣令所言不可施行尋臣之所奏非曰嚴刑竊謂高帝以後至于孝宣其所施行多合經傳宜比方令事驗之往古聿遵前典事無難改不勝至願願得召見若對尚書近臣口陳其要

對尚書狀

帝令尚書問狀統對

聞聖帝明王制立刑罰故雖堯舜之盛猶誅四凶經曰

天討有罪五刑五庸哉又曰爰制百姓于刑之衷孔子曰刑罰不中則民無所措手足中之為言不輕不重之謂也春秋之誅不避親戚所以防患救亂坐安衆庶豈無仁愛之恩貴絕殘賊之路也自高祖之興至於孝宣君明臣忠謀謨深博猶因循舊章不輕改革海內稱理斷獄益少至初元建平所減刑罰百有餘條盜賊浸多歲以萬數間者三輔從橫羣輩並起至燔燒茂陵火見未央其後隴西北地西河之賊越州度郡萬里交結攻

取庫兵劫略吏人詔書討捕連年不獲是時以天下無難百姓安平而狂狡之執猶至於此皆刑罰不衷愚人易犯之所致也由此觀之則刑輕之作反生大患惠加姦軌而害及良善也故臣統願陛下采擇賢臣孔光師丹等議

對尚書狀

東觀記○
即前疏語

元壽二年三輔盜賊羣輩並起至燔燒茂陵都邑煙火見未央宮前代未嘗所有其後隴西新興北地任橫任

崖西河曹况越州度郡萬里交結或從遠方四面會合
遂攻取庫兵劫略吏人國家開封侯之科以軍法追捕
僅能破散也

桓譚

字君山沛國相人王莽時為掌樂大夫更始立拜太中大夫建武中終郡丞著新論及賦

誄書奏凡

三十六篇

上光武陳時政所宜疏

世祖即位徵譚待詔上書不用大司空宋弘薦

拜議郎給事中因上

疏陳時政所宜不省

臣聞國之廢興在於政事政事得失由乎輔佐輔佐賢

明則俊士充朝而理合世務輔佐不明則論失時宜而舉多過事夫有國之君俱欲興化建善然而政道未理者其所謂賢者異也昔楚莊王問孫叔敖曰寡人未得所以為國是也叔敖曰國之有是衆所惡也恐王不能定也王曰不定獨在君亦在臣乎對曰君驕士曰士非我無從富貴士驕君曰君非士無從安存人君或至失國而不悟士或至飢寒而不進君臣不合則國是無從定矣莊王曰善願相國與諸大夫共定國是也蓋善政

者視俗而施教察失而立防威德更興文武迭用然後
政調於時而躁人可定昔董仲舒言理國譬若琴瑟其
不調者則改而更張夫更張難行而拂衆者亡是故賈
誼以才逐而鼂錯以智死世雖有殊能而終莫敢談者
懼于前事也且設法禁者非能盡塞天下之姦皆合衆
人之所欲也大抵取便國利事多者則可矣夫張官置
吏以理萬人縣賞設罰以別善惡惡人誅傷則善人蒙
福矣今人相殺傷雖已伏法而私結怨讎子孫相報後

忿深前至於滅戶殄業而俗稱豪健故雖有怯弱猶勉而行之此為聽人自理而無復法禁者也今宜申明舊令若已伏官誅而私相傷殺者雖一身逃亡皆徙家屬於邊其相傷者加常二等不得雇山贖罪如此則仇怨自解盜賊息矣夫理國之道舉本業而抑末利是以先帝禁人二業錮商賈不得宦為吏此所以抑并蕪長庶恥也今富商大賈多放田貨中家子弟為之保役趨走與臣僕等勤收稅與封君比入是以衆人慕效不耕而

食至乃多通侈靡以淫耳目今可令諸商賈自相糾告
若非身力所得皆以臧畀告者如此則專役一已不敢
以貨與人事寡力弱必歸功田畝田畝脩則穀入多而
地力盡矣又見法令決事輕重不齊或一事殊法同罪
異論姦吏得因緣為市所欲活則出生議所欲陷則與
死比是為刑開二門也今可令通義理明習法律者校
定科比一其法度班下郡國蠲除故條如此天下知方
而獄無怨濫矣

東觀載譚記曰賈人多通侈靡之物羅紈綺繡雜錄玩好以淫人耳目而竭盡

其財是為下樹奢媒而置貧本也求人之儉約富足何可得乎夫俗難卒變而人閭不可暴化宜抑其路使之稍自衰焉

論信讖酌賞疏

是時帝方信讖多以決定嫌疑又酌賞少薄天下不時安定譚

復上疏帝省奏愈不悅出為六安郡丞

臣前獻瞽言未蒙詔報不勝憤懣冒死復陳愚夫策謀有益於政道者以合人心而得事理也凡人情忽於見事而貴於異聞觀先王之所記述咸以仁義正道為本非有奇怪虛誕之事盖天道性命聖人所難言也自子

貢以下不得而聞况後世淺儒能通之乎今諸巧慧小才伎數之人增益圖書矯稱讖記以欺惑貪邪誑誤人主焉可不抑遠之哉臣譚伏聞陛下窮折方士黃白之術甚為明矣而乃欲聽納讖記又何誤也其事雖有時合譬猶卜數隻偶之類陛下宜垂明聽發聖意屏羣小之曲說述五經之正義略雷同之俗語詳通人之雅謀又臣聞安平則尊道術之士有難則貴介冑之臣今聖朝興復祖統為人臣主而四方盜賊未盡歸伏者此權

謀未得也臣譚伏觀陛下用兵諸所降下既無重賞以
相思誘或至虜掠奪其財物是以兵長渠率各生狐疑
黨輩連結歲月不解古人有言曰天下皆知取之為取
莫知與之為取陛下誠能輕爵重賞與士共之則何招
而不至何說而不釋何向而不開何征而不剋如此則
能以狹為廣以遲為速亡者復存失者復得矣

僊賦序

余少嘗為中郎從孝成帝出祠甘泉河東見郊先置華

陰集靈宮宮在華山下武帝所造欲以裛集僊者王喬
赤松子故名殿為存僊端門南向山署曰望僊門竊有
樂高妙之志即書壁為小賦以頌美

蔡茂

字子禮河內
懷人愜司徒

請禁制貴戚疏

茂遷廣漢太守糾案陰氏賓客
因董宣劾湖陽公主上書光武

納之

臣聞興化致教必由進善康國寧人莫大理惡陛下聖
德重興再隆大命即位以來四海晏然誠宜夙興夜寐

雖休勿休然頃者貴戚椒房之家數因恩執干犯吏禁
殺人不死傷人不論臣恐繩墨棄而不用斧斤廢而不
舉近湖陽公主奴殺人西市而與主共輿出入宮省逋
罪積日寃魂不報洛陽令董宣直道不顧干主討姦陛
下不先澄審召欲加箠當宣受怒之初京師側耳及其
蒙宥天下拭目今者貴戚憍逸賓客放濫宜敕有司案
理姦罪使執平之吏永申其用以厭遠近不緝之情

歐陽欽

字王思樂安千乘人更始
立為原武令歷大司徒

賜繇延教

欽建武初為汝南太守舊俗十月享會縣齋牛酒到府讌飲欽臨享下教

主簿讀書將引延受賜時郅憚為郡功曹以延貪邪舉非其人奉觥罰欽欽敬受之

西部督郵繇延天資忠貞稟性公方典部折衝摧破姦

雄不嚴而治書曰安民則惠黎民懷之蓋舉善以教則

不能者勸令與諸儒共論延功顯之于朝太守敢嘉厥

休牛酒養德

風俗通後漢書未全見後漢紀雄書作出治作理敢一作敬

禮震

求代歐陽歙死書

欽自歐陽生傳伏生尚書至欽八世為汝南教授數百人

徵為大司徒坐汝南減罪千餘萬下獄平原
禮震年十七聞獄當斷馳之京師至獲嘉自

繫上書而
歎已死

伏見臣師大司徒歐陽歙學為儒宗八世博士而以臧
咎當伏重辜歙門弟子幼未能傳學身死之後永為廢
絕上令陛下獲殺賢之譏下使學者喪師資之益乞殺
身以代歙命

杜詩

字公君河內汲人歷
汝南都尉南陽太守

上光武辭郡疏

詩為南陽太守政治清平自以
久居大郡求避功臣疏不許

陛下亮成天工克濟大業偃兵脩文羣帥反旅海內合
和萬世蒙福天下幸甚唯匈奴未譬聖德威侮二垂陵
虐中國邊民虛耗不能自守臣恐武猛之將雖勤亦未
得解甲橐弓也夫勤而不息亦怨勞而不休亦怨怨恨
之師難復責功臣伏覩將帥之情功臣之望冀一休足
於內郡然後即戎出命不敢有恨臣愚以為師克在和
不在衆陛下雖垂念北邊亦當頗泄用之昔湯武善御
衆故無忿驚之師陛下起兵十有三年將帥和睦士卒

鳬藻令若使公卿郡守出於軍壘則將帥自厲士卒之
復比於宿衛則戎士自百何者天下已安各重性命大
臣以下咸懷樂土不讎其功而厲其用無以勸也陛下
誠宜虛缺數郡以俟振旅之臣重復厚賞加于久役之
士如此緣邊屯戍之師競而忘死棄城拒塞之吏不辭
其勞則烽火精明守戰堅固聖王之政必因人心今猥
用愚薄塞功臣之望誠非其宜臣詩伏自惟忖本以史
吏一介之才遭陛下創制大業賢俊在外空乏之間超

受大恩收養不稱奉職無效久竊祿位今功臣懷愠誠
惶誠恐八年上書乞避功德陛下殊恩未許放退臣詩
蒙恩尤深義不敢苟冒虛請誠不勝至願願退大郡受
小職及臣齒壯力能經營劇事如使臣詩必有補益復
受大位雖折珪授爵所不辭也惟陛下哀矜

請立虎符疏

建武初但以璽書發兵未有
虎符之信詩上疏請立從之

臣聞兵者國之凶器聖人所慎舊制發兵皆以虎符其
餘徵調竹使而已符策合會取為大信所以明著國命

斂持威重也間者發兵但用璽書或以詔令如有姦人詐偽無由知覺以為軍旅尚興賊虜未殄徵兵郡國宜有重慎可立虎符以絕姦端昔魏之公子威傾隣國猶假兵符以解趙圍若無如姬之仇則其功不顯事有煩而不可省費而不得已蓋謂此也

薦伏湛疏

湛以大司徒坐事策免詩時為南陽太守疏薦徵還未拜卒

臣聞唐虞以股肱康文王以多士寧是故詩稱濟濟書曰良哉臣詩竊見故大司徒陽都侯伏湛自行束脩訖

無毀玷篤信好學守死善道經為人師行為儀表前在
河內朝歌及居平原吏人畏愛則而象之遭時反覆不
離兵凶秉節持重有不可奪之志陛下深知其能顯以
宰相之重衆賢百姓仰望德義微過斥退久不復用有
識所惜儒士痛心臣竊傷之湛容貌堂堂國之光暉智
略謀慮朝之淵藪髣髴厲志白首不衰實足以先後王
室名足以光示遠人古者選擢諸侯以為公卿所以砥
礪藩屏勸進忠良是故四方回首仰望京師柱石之臣

宜居輔弼出入禁門補缺拾遺臣詩愚戇不足以知宰相之才竊懷區區敢不自竭臣前為侍御史上封事言湛公廉愛下好惡分明累世儒學素持名信經明行脩通達國政尤宜近侍納言左右舊制九州五尚書令一郡二人可以湛代頗為執事所非但臣詩蒙恩深渥所言誠有益於國雖死無恨故復越職觸冒以聞

後漢書

杜林

字伯山扶風茂陵人涼州刺史鄴之子少博洽稱通儒初為郡吏兵亂依隗囂東歸仕歷

光祿勳
大司空

遣子奉馬援書

林與援同鄉里素相親厚援從南方還時林馬適死援令子持馬一匹遣林曰朋友有車馬之饋可且以備乏林受之遣子奉書援謂子曰人當以此為法是杜伯山所以勝我也

將軍內施九族外有賓客望恩者多林父子兩人食列

卿祿常有盈今送錢五萬

東觀漢記○常有盈一作祿出常有餘送作奉

上光武議郊祭疏

東觀漢記建武二年初制郊北於洛陽城南七年五月詔

三公曰漢當郊堯其與卿大夫博士議林為侍御史獨以為漢不緣堯與殷周異宜疏奏

定從林議

臣聞營河雒以為民刻肌膚以為刑封疆畫界以建諸
侯井田什一以供國用三代所同及至漢興因時宜趨
世務省煩苛取實事不苟貪高亢之論是以去中土之
京師就關內之遠郡除肉刑之重律用髡鉗之輕法郡
縣不置世祿之家農人三十而取一政卑易行禮簡易
從民無愚智思仰漢德樂承漢祀基業特起不因緣堯
堯遠於漢民不曉信言提其耳終不悅諭后稷近於周
民戶知之世據以興基由其祚本於漢異郊祀高帝誠

從民望得萬國之歡心天下福應莫大於此民奉種祀
且猶世主不失先俗羣臣僉薦鯨考績不成九載乃殛
宗廟至重衆心難違不可卒改詩云不愆不忘率由舊
章明當專用祖宗之故文章也宜如舊制以解天下之惑
合于易之所謂先天而天弗違後天而奉天時之義方
軍旅在外祭可且如元年郊祭故事

上光武論水災疏

東觀書曰建武八年間郡國
比大水湧泉盈溢杜林以為

倉卒時兵擅權作威張氏雖皆降散猶少有
遺脫長吏制御無術令得復熾元元侵陵之

所致也上
疏從之

臣聞先王無二道明聖用而治同也見惡如農夫之務
去草焉芟夷蘊崇之絕其本根勿使能殖畏其易也古
今通道傳其法於有根狼子野心奔馬善驚成王深知
其終卒之患故以殷氏六族分伯禽七族分康叔懷姓
九宗分唐叔檢押其姦宄又遷其餘於成周舊地雜俗
旦夕拘錄所以挫其強御之力詘其驕恣之節也及漢
初興上稽舊章合符重規徙齊諸田楚昭屈景燕趙韓

魏之後以稍弱六國強宗邑里無營利之家野澤無蕪
併之民萬里一統海內賴安後輒因喪祖之痛脅以送
終之義故遂相率而陪園陵無反顧之心追觀往法政
皆神道設教強幹弱枝本支百世之要也是以皆永享
康寧之福無怵惕之憂繼嗣承業恭已而治蓋此助也
其被灾害民輕薄無累重者兩府遣吏護送饒穀之郡
或懼死亡卒為傭賃亦所以消散其口救贍全其性命
昔魯隱有賢行將致國於桓公乃留連貪位不能早退

况草創兵長卒無德能直以擾亂乘時擅權作威玉食
狃孫之意徼幸之望蔓延無足張步之計是也小民負
縣官不過身死負兵家滅門殄世陛下昭然獨見成敗
之端或屬諸侯官府元元少得舉首仰視而尚遺脫二
千石失制御之道令得復昌熾縱橫比年大雨水潦暴
長涌泉盈溢灾壞城郭官寺吏民廬舍潰徙離處漬成
坑坎臣聞水陰類也易卦地上有水比言性不相害故
曰樂也而猥相毀墊淪失常敗百姓安居殆陰下相為

蠹賊有大小勝負不齊均不得其所侵陵之象也詩云
畏天之威于時保之唯陛下留神明察往來懼思天下
幸甚

薦鄭興奏

林先與興同寓隴右及興東
歸乃薦之徵為太中大夫

竊見河南鄭興執義堅固敦悅詩書好古博物見疑不
惑有公孫僑觀射父之德宜侍帷幄典職機密昔張仲
在周燕翼宣王而詩人悅喜惟陛下留聽少察以助萬
分

論刑法奏

建武十四年林時為光祿勳羣臣上言古者肉刑嚴重則人畏法令今憲

律輕薄故姦軌不勝宜增科禁以防其源詔下公卿林奏從之

夫人情挫辱則義節之風損法防繁多則苟免之行興
孔子曰導之以政齊之以刑民免而無恥導之以德齊
之以禮有恥且格古之明王深識遠慮動居其厚不務
多辟周之五刑不過三千大漢初興詳覽失得故破矩
為圓斲彫為樸蠲除苛政更立疏網海內歡忻人懷寬
德及至其後漸以滋章吹毛索疵詆欺無限果桃李茹

之饋集以成，減小事無妨於義，以為大戮，故國無廉士，家無完行，至於法不能禁令，不能止上下相遁，為敝彌深。臣愚以為宜如舊制，不合翻移。

後漢紀動居其厚下，云故湯去三面之網。

易著三驅之義，所以德刑參用而示民有恥。漢德寬厚，民無二心。軍士左袒樂為劉氏多恩之所致也。至其後世不能以德而勤於法，故有吹毛求疵云云。

衛宏

字敬仲，東海人。光武時為議郎，嘗作漢舊儀及賦頌詠七首。

古文尚書序

宏從大司空杜林授古文尚書作訓詁。

秦既焚書，恐天下不從所改更法，而諸生到者拜為郎。

前後七百人乃密種瓜於驪山陵谷中溫處瓜實成詔
博士諸生說之人言不同乃令就視為伏機諸生賢儒
皆至焉方相難不決因發機從上填之以土皆壓終乃
無聲也

伏生徵之老不能行遣太常掌故鼂錯往讀之年九十
餘不能正言言不可曉使其女傳言教錯齊人語多與
潁川異錯所不知者凡十二三略以其意屬讀而已也

並史記
正義

張純

字伯仁京兆杜陵人富平侯安世孫歷位大司空

論宗廟奏

純明習朝典正定禮儀是時宗廟未備昭穆失序純兼虎賁中郎將與太

僕朱浮共奏詔下公卿議以宣元皇帝尊為祖父可親奉祠成帝以下有司行事別為南

頓君立皇考廟從之

陛下興於匹庶蕩滌天下誅鉏暴亂興繼祖宗竊以經義所紀人事衆心雖實同創革而名為中興宜奉先帝恭承祭祀者也元帝以來宗廟奉祠高皇帝為受命祖孝文皇帝為太宗孝武皇帝為世宗皆如舊制又立親

廟四世推南頓君以上盡於舂陵節侯禮為人後者則
為之子既事太宗則降其私親今禘祫高廟陳序昭穆
而舂陵四世君臣並列以卑廁尊不合禮意設不遭王
莽而國嗣無寄推求宗室以陛下繼統者安得復顧私
親違禮制乎昔高祖以自受命不由太上宣帝以孫後
祖不敢私親故為父立廟獨羣臣侍祠臣愚謂宜除今
親廟以則二帝舊典願下有司博采其議

祭祀志載奏議云禮為人

子事大宗降其私親禮之設施不授之與自得之異意
當除今親廟四孝宣皇帝以孫後祖為父立廟於奉明

曰皇考廟獨羣臣侍祠願下有司議先帝四廟當代親廟者及皇考廟事下公卿博士議郎大司徒涉等議宜奉所代立平帝哀帝成帝元帝廟代今親廟兄弟以下使有司祠宜為南頓君立皇考廟祭上至舂陵節侯羣臣奉祠時議有異不上著可涉等議下詔

光武詔

以宗廟處所未定且祫祭高廟其成哀平且祠祭長安故高廟其南陽舂陵歲時各且因故園廟祭祀園廟去太守治所遠者在所令長行太守事侍祠惟孝宣帝有功德其上尊號曰中宗

光武詔

禘祫之祭不行已久矣三年不為禮禮必壞三年不為樂樂必崩宜據經典詳為其制

論禘祫奏

建武二十六年詔詳禘祫之禮純上奏自是禘祫遂定

禮三年一祫五年一禘春秋傳曰大祫者何合祭也毀廟及未毀廟之主皆登合食乎太祖五年而再毀漢舊制三年一祫毀廟主合食高廟存廟主未嘗合祭元始五年諸王公列侯廟會始為禘祭又前十八年親幸長

安亦行此禮禮說三年一閏天氣小備五年再閏天氣
大備故三年一祫五年一禘禘之為言諦諦定昭穆尊
卑之義也禘祭以夏四月夏者陽氣在上陰氣在下故
正尊卑之義也祫祭以冬十月冬者五穀成熟物備禮
成故合聚飲食也斯典之廢於茲八年謂可如禮施行
以時定議

請封禪奏

建武三十年甲寅純上請封禪中元
元年光武乃東巡岱宗以純侍御史

大夫
從

自古受命而帝治世之隆必有封禪以告成功焉樂動
聲儀曰以雅治人風成於頌有周之盛成康之間郊配
封禪皆可見也書曰歲二月東巡狩至於岱宗柴則封
禪之義也臣伏見陛下受中興之命平海內之亂脩復
祖宗撫存萬姓天下曠然咸蒙更生恩德雲行惠澤雨
施黎元安寧夷狄慕義詩曰受天之祜四方來賀今攝
提之歲蒼龍甲寅德在東宮宜及嘉時遵唐帝之典繼
孝武之業以二月東巡狩封於岱宗明中興勒功勲復

祖統報天神禪梁父祀地祇傳祚子孫萬世之基也

登封泰山刻石文

建武三十二年二月上至奉高遣侍御史與蘭臺令史將

工先上山刻文于石晨燎祭天於泰山下用樂如南郊

維建武三十有二年二月皇帝東巡狩至於岱宗柴望秩於山川班於羣神遂覲東后從臣太尉憲行司徒事特進高密侯禹等漢賓二王之後在位孔子之後褒成侯序在東后藩王十二咸來助祭河圖赤伏符曰劉秀發兵捕不道四夷雲集龍鬪野四七之際火為主河圖

會昌符曰赤帝九世巡省得中治平則封誠合帝道孔
矩則天文靈出地祇瑞興帝劉之九會命岱宗誠善用
之姦偽不萌赤漢德興九世會昌巡岱皆當天地扶九
崇經之常漢大興之道在九世之王封於泰山刻石著
紀禪于梁父退省考五河圖合古篇曰帝劉之秀九名
之世帝行德封刻政河圖提劉子曰九世之帝方明聖
持衡拒九州平天下子雒書甄曜度曰赤三德昌九世
會脩符合帝際勉刻封孝經鉤命決曰予誰行赤劉用

帝三建孝九會脩專茲竭行封岱青河雒命后經讖所
傳昔在帝堯聰明密微讓與舜庶後裔握機王莽以舅
后之家三司鼎足冢宰之權勢依託周公霍光輔幼歸
政之義遂以篡叛僭號自立宗廟隳壞社稷喪亡不得
血食十有八年揚徐青三州首亂兵革橫行延及荊州
豪傑并兼百里屯聚往往僭號北夷作寇千里無烟無
雞鳴犬吠之聲皇天睠顧皇帝以匹庶受命中興年二
十八載興兵起是以中次誅討十有餘年罪人則斯得

黎庶得居爾田安爾宅書同文車同軌人同倫舟輿所
通人迹所至靡不貢職建明堂立辟雍起靈臺設庠序
同律度量衡脩五禮五玉三帛二牲一死贅吏各脩職
復于舊典在位三十有二年年六十二乾乾日昃不敢
荒寧涉危歷險親巡黎元恭肅神祇惠恤耆老理庶遵
古聰允明恕皇帝唯慎河圖雒書正文是月辛卯柴登
封泰山甲午禪於梁陰以承靈瑞以為兆民永茲一字
垂於後昆百僚從臣郡守師尹咸蒙祉福永永無極秦

相李斯燔詩書樂崩禮壞建武元年已前文書散亡舊
典不具不能明經文以章句細微相况八十一卷明者
為驗又其十卷皆不昭晰子貢欲去告朔之餼羊子曰
賜也爾愛其羊我愛其禮後有聖人正失誤刻石記

趙熹

字伯陽南陽宛人歷位太尉章帝時為太傅
熹○東觀記名熹後漢書作熹據字疑熹是

請封禪奏

東觀漢記建武三十年太尉趙熹等
上言封禪詔不許至三十二年始行

自古帝王每世之隆未嘗不封禪陛下聖德洋溢順天
行誅撥亂中興作民父母脩復宗廟救萬姓命黎庶賴

福海內清平功成治定羣司禮官咸以為宜登封告成
為民報德百王所同當仁不讓宜登封岱宗正三雍之
禮以明靈契望秩羣神以承天心也

光武詔報

即位三十年百姓怨氣滿腹吾誰欺欺天乎曾謂泰山
不如林放何汙七十二代之編錄桓公欲封管仲非之

若郡縣遠遣吏上壽盛稱虛美必髡蕪令屯田

後漢紀
載張純

請封禪詔曰是何言也當今日月薄蝕災異
並臻吏失其職百姓怨譴吾誰欺欺天乎

同前

典略

災異連仍日月薄蝕百姓怨數而有事太山汚七十二
代編錄以羊皮雜貂裘何强顏耶

梁松

字伯孫純之于尚光武舞陰長公主再
遷虎賁中郎將生懸書誹謗下獄死

祭配林議

建武三十年三月上幸魯過泰山告
太守以上過故承詔祭山梁松等議

記曰齊將有事泰山先有事配林蓋諸侯之禮也河嶽
視公侯王者祭焉宜無即事之漸不祭配林

列漢九世封禪奏

三十二年正月上齋夜讀河
雒會昌符曰赤劉之九會命

岱宗不慎克用何益于承誠善用之姦偽不萌乃詔松等復案索河碓識文言九世封禪事松等列奏凡三十六事乃許

登封告成為民報德百王所同陛下輒拒絕不許臣下不敢頌功述德案河碓識書赤漢九世當巡封泰山凡三十六事傳奏左帷陛下遂以仲月令辰遵岱嶽之正禮奉圖碓之明文以和靈瑞以為兆民

議封禪特立石檢疏

詔議封禪所施用有司奏當用玉檢藏方石再累置

壇中上以功難詔松因元封時故封石空檢加封而已松上疏爭之乃更刻石成禮焉

登封之禮告功皇天垂後無窮以為萬民也承天之敬
尤宜章明奉圖書之瑞尤宜顯著今因舊封竄寄玉牒
故石下恐非重命之義受命中興宜當特異以明天意

論馬防等奏

東觀漢記司隸校尉梁松奏○鼎按范曄後漢書松尚光武女以馬

援不答拜積不平援南征松代監軍因事陷之章帝初授子防以特進就第有司奏防兄弟奢侈踰僭濁亂聖化悉免就國又按梁松傳松明帝永平四年生誹謗下獄死安得及防就第時亦未為司隸此必自一梁松也

特進防光廖廖子豫兄弟父子并受爵土榮顯冠世多

金匱要略卷七
買京師膏腴美田作大廬舍近帶城郭妨困小民

博士充等

封禪議

上至泰山有司復奏河雒圖記九世宜封禪事尤著明博士充等議奏上詔報

殷統未絕黎庶繼命高宗久勞猶為中興武王因父受命之列據三代郊天因孔子甚美其功後世謂之聖王漢統中絕王莽盜位一民莫非其人尺土靡不其有宗廟不祀十有八年陛下無十室之資奮振於匹夫除殘去賊興復祖宗集就天下海內治平夷狄慕義功德盛

於高宗宣王宜封禪為百姓祈福請親定刻石紀號文
太常奏儀制

光武詔報

許昔小白欲封夷吾難之季氏欲旅仲尼非焉蓋齊諸
侯季氏大夫皆無事於泰山今予末小子巡祭封禪德
薄而任重一則以喜一則以懼喜於得承鴻業帝堯善
及子孫之餘賞蓋應圖錄當得是當懼於過差執事不
弘信道不篤為議者所誘進後世知吾罪深矣

馬第伯

封禪儀記

車駕正月二十八日發雒陽宮二月九日到魯遣守謁者郭堅伯將徒五百人治泰山道十日魯遣宗室諸劉及孔氏瑕丘丁氏上壽受賜皆詣孔氏宅賜酒肉十一日發十二日宿奉高是日遣虎賁郎將先上山三案行還益治道徒千人十五日始齋國家居太守府舍諸王居府中諸侯在縣庭中齋諸卿校尉將軍大夫黃門郎

百官及宋公衛公褒成侯東方諸侯維中小侯齋城外汶水上太尉太常齋山虞馬第伯自云某等七十人先之山虞觀祭山壇及故明堂宮郎官等郊肆處入其幕府觀治石石二枚狀博平圓九尺此壇上石也其一石武帝時石也時用五車不能上也因置山下為屋號五車石四維距石長丈二廣二尺厚尺半所四枚檢石長三尺廣六寸狀如封篋長檢十枚一紀號石高丈二廣三尺厚尺二寸名曰立石一枚刻文字紀功德是朝上

山騎行往往道峻峭不騎步牽馬乍步乍騎且相半至
中觀留馬去平地三十里南向極望無不覩仰望天關
如從谷底仰觀抗峰其為高也如視浮雲其峻也石壁
窅窻如無道徑遙望其人端如行朽兀或為白石或雪
久之白者移過樹乃知是人也殊不可上四布僵卧石
上有頃復蘇亦賴齋酒脯處處有泉水目輒為之明復
勉強相將行到天關自以已至也問道中人言尚十餘
里其道旁山脅大者廣八九尺狹者五六尺仰視巖石

松樹鬱鬱蒼蒼若在雲中俛視谿谷碌碌不可見丈尺
遂至天門之下仰視天門竅遼如從穴中視天直上七
里賴其羊腸逶迤名曰環道往往有絙索可得而登也
兩從者扶挾前人相牽後人見前人履底前人見後人
頂如畫重累人矣所謂磨胸控石捫天之難也初上此
道行十餘步一休稍疲咽脣焦五六步一休牒牒據頓
地不避濕暗前有燥地目視而兩脚不隨早食上晡後
到天門郭使者得銅物銅物形狀如鍾又方柄有孔莫

能識疑封禪具也得之者汝南召陵人姓楊名通東上
一里餘得木甲木甲者武帝時神也東北百餘步得封
所始皇立石及闕在南方漢武在其北二十餘步得北
垂圓臺高九尺方圓三丈所有兩陛人不得從上從東
陞上臺上有壇方一丈二尺所上有方石四維有距石
四面有闕鄉壇再拜謁人多置錢物壇上亦不掃除國
家上見之則詔書所謂酢梨酸棗狼籍散錢處數百幣
帛具道是武帝封禪至泰山下未及上百官為先上跪

拜置梨棗錢于道以求福即此也東山名曰日觀日觀者雞一鳴時見日始欲出長三丈所秦觀者望見長安吳觀者望見會稽周觀者望見齊西北有石室壇以南有玉盤中有玉龜山南脅神泉飲之極清美利人日入下去行數環日暮時頗雨不見其道一人居其前先知蹈有人乃舉足隨之比至天門下夜人定矣

補訂馬第伯建武封禪儀記

明少保孫
鑪補訂

建武三十二年車駕正月二十八日發雒陽宮二月九

日到魯遣守謁者郭堅伯將徒五百人治泰山道十日
魯遣宗室諸劉及孔氏瑕丘丁氏上壽受賜皆詣孔氏
宅賜酒肉十一日發十二日宿奉高是日遣虎賁郎將
先上山一一案行還益治道徒千人十五日始齋國家
居太守府舍諸王居府中諸侯在縣庭中齋諸卿校尉
將軍大夫黃門郎百官及宋公衛公褒成侯東方諸侯
雒中小侯齋城外汶水上太尉太常齋山虞馬第伯自
云某等七十人先之山虞觀祭山壇及故明堂宮郎官

等郊祀處入其幕府觀治石石二枚狀博平圓九尺此
壇上石也其一石武帝時石也時用五車不能上也因
置山下為屋號五車石四維距石長丈二廣二尺厚尺
半所四枚檢石長三尺廣六寸狀如封篋長檢十枚一
紀號石高丈二尺廣三尺厚尺二寸名曰立石一枚刻
文字紀功德是朝上山騎行往往道峻峭不騎步牽馬
乍步乍騎且相半至中觀留馬去平地二十里南向極
望無不覩仰望天闕如從谷底仰觀抗峰其為高也如

視浮雲其峻也石壁竅窳如道無徑遙望其人端端如
行朽兀或為白石或如雪久之白者移過樹乃知是人
也殊不可上四布僵卧石上有頃復蘇亦賴齋酒脯處
處有泉水目輒為之明復勉強相將行將天關自以已
至也問道中人言尚十餘里其道旁山脇大者廣八九
尺狹者廣五六尺仰視巖石松樹鬱鬱蒼蒼若在雲中
俛視谿谷碌碌不可見丈尺遂至天門之下仰視天門
窅遼如從穴中視天直上七里賴其羊腸逶迤名曰環

道往往有絙索可得而登也兩從者扶挾前人相牽後人見前人履底前人見後人頂如畫重累人矣所謂磨胸捏石捫天之難也初上此道行十餘步一休稍疲咽脣焦五六步一休牒牒據頓地不避濕暗前有燥地目視而兩腳不隨早食上晡後到天門郭使者得銅物銅物形狀如鍾又方柄有孔莫能識也疑封禪具也得之者汝南召陵人姓楊名通東上一里餘得木甲木甲者武帝時神也東北百餘步得封所始皇立石及闕在南

方漢武在其北二十餘步得北垂圓臺高九尺方圓三丈所有兩陛人不得從上從東陞上臺上有壇方一丈二尺所上有方石四維有距石四面有闕鄉壇再拜謁人多致錢物壇上亦不得掃除國家上見之則詔書所謂酢梨酸棗狼籍散錢處數百幣帛具道是武帝封禪至泰山下未及上百官為先上跪拜置梨棗錢于道以求福即此也東山名曰日觀日觀者雞一鳴時見日始欲出長三丈所秦觀者望見長安吳觀者望見會稽周

觀者望見齊西北有石室壇以南有玉盤中有玉龜山
南脇神泉飲之極清美利人日入下去行數環日暮時
頗雨不見其道一人居其前先知蹈有人乃舉足隨之
比至天門下夜人定矣車駕十九日之山虞國家居亭
百官布野比日山上雲氣成宮闕百官並見之二十一
日夕牲時白氣廣一丈東南極望致濃厚時天清和無
雲瑞命篇岱嶽之瑞以日為應也二十二日晨燎祭天
於泰山晨祭也日高三丈所燔燎燔燎煙正上也百官

各以次上郡儲輦三百為貴臣諸公王侯卿大夫百官
皆步上少用輦食時國家御首輦人輓升山至中觀休
須臾復上日中後到山上更衣須臾羣臣畢就位早晡
時即位于壇國家臺上北面虎賁陞戟臺下尚書令奉
玉牒檢國家以寸二分璽親封之訖騶騎三千餘人發
壇上方石尚書令藏玉牒已復石覆訖尚書令以五寸
印封石檢以金為繩以石三檢東方西方各三檢檢中
石泥及壇土色赤白黑各如其方色國家再拜羣臣稱

萬歲音動山谷有氣屬天遙望不見山巔山巔人在氣
中不知也封畢有頃詔百官以次下國家隨後數百人
維持行相逢推百官連延二十餘里道多迫小深谿高
岸數百丈步從匍匐邪上起近炬火止亦駱驛步從觸
擊大石石聲正謹但謹石見相應和者腸不能已口不
能默夜半後到百官明日乃訖其中老者氣劣不能行
卧巖石下明日早大醫令復遵問起居國家云昨上下
山欲行迫前欲休則後人所蹈道峻危險恐不能度國

家不勞百官以下露卧水飲無一人蹉跌無一人疾病
豈非天邪泰山率多暴雨如今上直下柴祭封登清晏
溫和明日上壽賜百官省事事畢發暮宿奉高三十
里明日發至梁甫九十里夕牲二十五日禪祭地於梁
陰功效如彼天應如此羣臣上壽國家不聽四月己卯
大赦天下以建武三十二年為建武中元元年

鄭興

字少贛河南開封人初仕更始為涼州刺史
歸隗囂建武初徵為太中大夫左轉蓮勺令

論日食疏

興明左氏周官長於歷數建武七年
三月晦日食興為太中大夫上疏多

有所
納

春秋以天反時為災地反物為妖人反德為亂亂則妖
災生往年以來謫咎連見意者執事頗有闕焉按春秋
昭公十七年夏六月甲戌朔日有食之傳曰日過分而
未至三辰有災於是百官降物君不舉避移時樂用鼓
祝用幣史用辭令孟夏純乾用事陰氣未作其災尤重
夫國無善政則謫見日月變咎之來不可不慎其要在
因人之心擇人處位也堯知鯀不可用而用之者屈已

之明因人之心也齊桓反政而相管仲晉文歸國而任
郤穀者是不私其私擇人處位也今公卿大夫多舉漁
陽太守郭伋可大司空者而不以時定道路流言咸曰
朝廷欲用功臣功臣用則人位謬矣願陛下上師唐虞
下覽齊晉以成屈已從衆之德以濟羣臣讓善之功夫
日月交會數應在朔而頃年日食每多在晦先時而合
皆月行疾也日君象而月臣象君亢急則臣下促迫故
行疾也今年正月繁霜自爾已來率多寒日此亦急咎

之罰天於賢聖之君猶慈父之於孝子也丁寧申戒欲其反政故災變仍見此乃國之福也今陛下高明而羣臣惶促宜留思柔克之政垂意洪範之法博采廣謀納羣下之策

范升

字辯卿代郡人歸漢為博士永平中為聊城令

奏記王邑

邑前大將軍商子

邑為王莽大司空辟升為議曹吏時莽頻發兵役徵賦繁興升乃奏記於邑邑雖然其言而竟不用令乘傳使上黨與漢兵會因留不還

升聞子以人不問於其父母為孝臣以下不非其君上
為忠今衆人咸稱朝聖皆曰公明蓋明者無不見聖者
無不聞今天下之事昭昭於日月震震於雷霆而朝云
不見公云不聞則元元焉所呼天公以為是而不言則
過小矣知而從令則過大矣二者於公無可以免宜乎
天下歸怨於公矣朝以遠者不服為至念升以近者不
悅為重憂今動與時戾事與道反馳騫覆車之轍探湯
敗事之後後出益可怪晚發愈可懼耳方春歲首而動

發遠役藜藿不充田荒不耕穀價騰躍斛至數千吏人
陷於湯火之中非國家之人也如此則胡貊守關青徐
之寇在於帷帳矣升有一言可以解天下倒懸免元元
之急不可書傳願蒙引見極陳所懷

後漢書

上光武讓博士書

建武二年徵升拜議郎遷博士疏讓不許由是重之云

臣與博士梁恭山陽太守呂羌俱脩梁丘易二臣年並
耆父經學深明而臣不以時退與恭並立深知羌學又
不能達慙負二老無顏於世誦而不行知而不言不可

開口以為人師願推博士以避恭羌

駁立費氏易左氏春秋書

尚書令韓歆疏欲為費氏易左氏春秋立

博士升上奏難者以太史公多引左氏升又上太史公違戾五經謬孔子言及左氏春秋

不可錄三十一事

臣聞主不稽古無以承天臣不述舊無以奉君陛下愍學微缺勞心經藝情存博聞故異端競進近有司請置京氏易博士羣下執事莫能據正京氏既立費氏怨望左氏春秋復以比類亦希置立京費已行次復高氏春

秋之家又有騶夾如令左氏費氏得置博士高氏騶夾
五經奇異並復求立各有所執乖戾分爭從之則失道
不從則失人將恐陛下必有厭倦之聽孔子曰博學約
之弗叛矣夫夫學而不約必叛道也顏淵曰博我以文
約我以禮孔子可謂知教顏淵可謂善學矣老子曰學
道日損損猶約也又曰絕學無憂絕末學也今費左二
學無有本師而多反異先帝前世有疑于此故京氏雖
立輒復見廢疑道不可由疑事不可行詩書之作其來

已久孔子尚周流游觀至於知命自衛反魯乃正雅頌
令陛下草創天下紀綱未定雖設學官無有弟子詩書
不講禮樂不脩奏立左費非政急務孔子曰攻乎異端
斯害也已傳曰聞疑傳疑聞信傳信而堯舜之道存願
陛下疑先帝之所疑信先帝之所信以示反本明不專
已天下之事所以異者以不一本也易曰天下之動貞
夫一也又曰正其本萬事理五經之本自孔子始謹奏
左氏之失凡十四事

追稱祭遵疏

遵建武九年卒帝
下升章諡曰成侯

臣聞先王崇政尊美屏惡昔高祖大聖深見遠慮班爵
割地與下分功著錄勲臣頌其德美生則寵以殊禮奏
事不名入門不趨死則疇其爵邑世無絕嗣丹書鐵券
傳於無窮斯誠大漢厚下安人長久之德所以累世十
餘厯載數百廢而復興絕而復續者也陛下以至德受
命先明漢道褒序輔佐封賞功臣同符祖宗征虜將軍
潁陽侯遵不幸早薨陛下仁恩為之感傷遠迎河南側

怛之慟形於聖躬喪事用度仰給縣官重賜妻子不可
勝數送死有以加生厚亡有以過存矯俗厲化卓如日
月古者臣疾君視臣卒君弔德之厚者也陵遲已來久
矣及至陛下復興斯禮羣下感動莫不自勵臣竊見遵
脩行積善竭忠於國北平漁陽西拒隴蜀先登坻上深
取略陽衆兵既退獨守衝難制御士心不越法度所在
吏人不知有軍清名聞於海內廉白著於當世所得賞
賜輒盡與吏士身無奇衣家無私財同產兄年以遵無

子娶妾送之遵乃使人逆而不受自以身任於國不敢
圖生慮繼嗣之計臨死遺誡牛車載喪薄葬洛陽問以
家事終無所言任重道遠死而後已遵為將軍取士皆
用儒術對酒設樂必雅歌投壺又建為孔子立後奏置
五經大夫雖在軍旅不忘俎豆可謂好禮悅樂守死善
道者也禮生有爵死有諡爵以殊尊卑諡以明善惡臣
愚以為宜因遵薨論敘衆功詳案諡法以禮成之顯章
國家篤古之制為後嗣法

毀周黨奏

黨建武中徵為議郎去職復被徵光武引見伏而不謁升奏論上以奏示

公卿下

詔賜帛

臣聞堯不須許由巢父而建號天下周不待伯夷叔齊而王道以成伏見太原周黨東海王良山陽王成等蒙受厚恩使者三聘乃肯就車及陛見帝廷黨不以禮屈伏而不謁偃蹇驕悍同時俱逝黨等文不能演義武不能死君釣采華名庶幾三公之位臣願與坐雲臺之下考試圖國之道不如臣言伏虛妄之罪而敢私竊虛名

誇上求高皆大不敬

漢紀王道以成下云
巍巍蕩蕩至今不絕

光武詔

監書此詔在升奏後
漢紀前後各一詔

自古明王聖主必有不賓之士伯夷叔齊不食周粟太
原周黨不受朕祿亦各有志焉其賜帛四十匹

同前

漢紀云黨見上自陳願守所志上
聽之下詔博士范升奏毀黨又詔

許由不仕有唐帝德不衰夷齊不食周粟王道不虧不
忍使黨久逡巡于汙君之朝其賜帛四十匹遣歸田里

又詔

自古堯有許由巢父周有伯夷叔齊自朕高祖有南山
四皓自古聖王皆有異士非獨今也伯夷叔齊不食周
粟太原周黨不食朕祿亦各有志焉

陳元

字長孫蒼梧廣信人建武初與桓譚杜
林鄭興俱為學者所宗辟司空司徒府

奏駁范升論左氏疏

元傳父欽左氏業為之訓
詁以升奏左氏不宜立諸

闕上疏下其議升與元相辯難凡
十餘上帝卒立左氏學置博士

陛下撥亂反正文武並用深愍經藝謬雜真偽錯亂每
臨朝日輒延羣臣講論聖道知丘明至賢親受孔子而

公羊穀梁傳聞於後世故詔立左氏博詢可否示不專
已盡之羣下也今論者沈溺所習翫守舊聞固執虛言
傳受之辭以非親見實事之道左氏孤學少與遂為異
家之所覆冒夫至音不合衆聽故伯牙絕弦至寶不同
衆好故卞和泣血仲尼聖德而不容於世況於竹帛餘
文其為雷同者所排固其宜也非陛下至明孰能察之
臣元竊見博士范升等所議奏左氏春秋不可立及太
史公違戾凡四十五事案升等所言前後相違皆斷截

小文媒黷微辭以年數小差掇為巨謬遺脫纖微指為大尤抉瑕擿釁掩其弘美所謂小辯破言小言破道者也升等又曰先帝不以左氏為經故不置博士後生所宜因襲臣愚以為若先帝所行而後主必行者則盤庚不當遷於殷周公不當營洛邑陛下不當都山東也往者孝武皇帝好公羊衛太子好穀梁有詔太子受公羊不得受穀梁孝宣皇帝在人間時聞衛太子好穀梁於是獨學之及即位為石渠論而穀梁氏興至今與公羊

並存此先帝後帝各有所立不必其相因也孔子曰純
儉吾從衆至於拜下則違之夫明者獨見不惑於朱紫
聽者獨聞不謬於清濁故離朱不為巧眩移目師曠不
為新聲易耳方今干戈少弭戎事略戢留思聖藝眷顧
儒雅採孔子下拜之義卒淵聖獨見之旨分明黑白建
立左氏解釋先聖之積結洮汰學者之累惑使基業垂
於萬世後進無復狐疑則天下幸甚臣元愚鄙嘗傳師
言如得以褐衣召見俯伏庭下誦孔氏之正道理丘明

之宿寃若辭不合經事不稽古退就重誅雖死之日生之年也

諫督察三公疏

元辟司空李通府大司農江馮言宜令司隸校尉督察三公事

下三府元上疏帝從之宣下其議

臣聞師臣者帝賓臣者霸故武王以太公為師齊桓以夷吾為仲父孔子曰百官總已聽於冢宰近則高帝優相國之禮太宗假宰輔之權及亡新王莽遭漢中衰專操國柄以偷天下况已自喻不信羣臣奪公輔之任損

宰相之威以刺舉為明，徵訐為直。至若陪僕告其君長，子弟變其父兄，網密法峻，大臣無所措手足，然不能禁。董忠之謀身為世戮，故人君患在自驕，不患驕臣失在自任，不在任人。是以文王有日昃之勞，周公執吐握之恭，不聞其崇刺舉務督察也。方今四海尚擾，天下未一，百姓觀聽咸張耳目，陛下宜修文武之聖典，襲祖宗之遺德，勞心下士，屈節待賢，誠不宜使有司察公輔之名。

尹敏

字幼季，南陽堵陽人，與班彪善，歷諫議大夫。

上光武論六沴疏

續漢書敏為諸生有經學建武二年上疏陳洪範消災之

術時帝方草創未遑其事命待詔公車拜郎中

六沴作見若是供御帝用不差神則大喜五福乃降用
章於下若不供御六罰既侵六極其下明供御則天報
之福不供御則禍災至欲尊六事之體則貌言視聽思
心之用治六事之揆以致乎太平而消除輻輳孽害也

孫福

上言劉茂

茂字子衛太原晉陽人為太守孫福門下掾建武三年詔求天下義士福

上言徵拜議郎
郎歷侍中

臣前為赤眉所攻吏民壞亂奔走趣山臣為賊所圍命如絲髮賴茂負臣踰城出保孟縣茂與弟觸冒兵刃緣山負食臣及妻子得度死命節義尤高宜蒙表擢以厲

義士

後漢書

方儲

對策

建武五年夏旱方儲對策見後漢書注

百姓苦士卒煩碎責租稅失中暴師外營經歷三代內

有怨女外有曠夫王者熟推其詳揆合於天圖之事情
旱災可除夫旱者過日天王無意於百姓恩德不行萬
民煩擾故天應以無澤

張汜

上言脩河

初平帝時河汴決壞未及得脩建武
十年陽武令張汜上言光武為發卒

營河功而浚儀令
樂俊復上言乃止

河決積久日月侵毀濟渠所漂數十計縣脩理之費其
功不難宜改脩隄防以安百姓

樂俊

上言

昔元光之間人庶熾盛緣隄墾殖而瓠子河決尚二十餘年不即壅塞今居家稀少田地饒廣雖未脩理其患猶可且新被兵革方興力役勞怨既多民不堪命宜須平靜更議其事

杜篤

字季雅京兆杜陵人延年玄孫為車騎將軍馬防從事中郎戰歿所著賦誄弔書讚七言

女誠雜文十八篇
明世論十五篇

上論都賦奏

篤以關中表裏山河先帝舊京不宜改營洛邑乃上表奏論都賦

臣聞知而復知是為重知臣所欲言陛下已知故略其梗概不敢具陳昔盤庚去奢行儉於亳成周之隆乃即中洛遭時制都不常厥邑賢聖之慮盖有優劣霸王之姿明知相絕守國之執同歸異術或弃去阻阨務處平易或據山帶河并吞六國或富貴思歸不顧見襲或掩空擊虛自蜀漢出即日車駕策由一卒或知而不從久都堯堉臣不敢有所據竊見司馬相如揚子雲作辭賦

以諷主上臣誠慕之伏作書一篇名曰論都謹并封奏如左

論都賦序

皇帝以建武十八年二月甲辰升輿洛邑巡於西嶽推天時順斗極排閭闔入函谷觀阨於峻甌圖險於隴蜀其三月丁酉行至長安經營宮室傷愍舊京即詔京兆乃命扶風齊肅致敬告觀園陵悽然有懷祖之思喟乎以思諸夏之隆遂天旋雲遊造舟於渭北旂涇流千乘

方輟萬騎駢羅衍陳於岐梁東橫乎大河瘞后土禮邠
郊其歲四月反於洛都明年有詔復函谷關作大駕宮
六王邸高車廐於長安修理東都城門橋涇渭往往繕
離觀東臨灞澹西望昆明北登長平規龍首撫未央傾
平樂儀建章是時山東翕然狐疑意聖朝之西都懼關
門之反拒也客有為篤言彼埽井之潢汙固不容乎吞
舟且洛邑之渟滢曷足以居乎萬乘哉咸陽守國利器
不可久虛以示姦萌篤未甚然其言也故因為述大漢

之崇世據雍州之利而今國家未暇之故以喻客意

衆瑞賦序

北堂書鈔

夫千金之裘非一狐之白雅頌之聲非一家之作也

邊論

北堂書鈔

匈奴請降毘毘罽罽帳幔羶裘積如丘山

大司馬吳漢誅

薦初忤美陽令被收會漢亮光武詔諸儒誅之薦于獄中為誄

辭最高賜

帛免刑

篤以為堯隆稷契舜嘉臯陶伊尹佐殷呂尚翼周若此

五臣功無與疇令漢吳公追而六之乃作誄曰朝失鯁
臣國喪爪牙天子愍悼中宮咨嗟四方殘暴公不茲征
征茲海內公其攸平泯泯羣黎賴公以寧勲業既崇持
盈守虛功成即退挹而損諸死而不朽名勒丹書功著
金石與日月俱

桓榮

字春卿沛國龍亢人歷太常

上謝皇太子疏

明帝為皇太子光武選求明經拜榮為議郎
使授太子後為少傅榮以太子經學成畢上

疏謝歸太

子報書

臣幸得侍帷幄執經連年而智學淺短無以補益萬分
今皇太子以聰睿之姿通明經義觀覽古今儲君副主
莫能專精博學若此者也斯誠國家福祐天下幸甚臣
師道已盡皆在太子謹使掾臣汜再拜歸道

歸猶
謝也

皇太子報桓榮書

莊以童蒙學道九載而典訓不明無所曉識夫五經廣
大聖言幽遠非天下之至精豈能與於此況以不才敢

承誨命昔之先師謝弟子者有矣上則通達經旨分明
章句下則去家慕鄉求謝師門今蒙下列不敢有辭願

君慎疾加餐重愛玉體

並後漢書

朱浮

字叔元沛國蕭人為司隸校尉歷大司空徙封新息侯顯宗時坐告賜死

與彭寵書

浮為幽州牧辟台州士引置幕府多發倉穀贍其妻子漁陽太守寵不從其令浮密奏寵帝徵之寵妻勸無應徵又與所親信計議吏皆怨浮勸寵止不應遂舉兵攻浮浮以書質責寵寵得書愈怒攻浮轉急浮糧盡遁走城降于寵尚書令侯霸奏浮當誅帝不忍以為

執金吾後寵為
其蒼頭所殺

蓋聞智者順時而謀愚者逆理而動常竊悲京城大叔
以不知足而無賢輔卒自棄于鄭也伯通以名字典郡
有佐命之功臨民親職愛惜倉庫而浮秉征伐之任欲
權時救急二者皆為國耳即浮疑相譖何不詣闕自陳
而為族滅之計乎朝廷之於伯通恩亦厚矣委以大郡
任以威武事有柱石之寄情同子孫之親匹夫媵母尚
能致命一餐豈有身帶三綬職典大郡而不顧恩義生

心外叛者乎伯通與吏人語何以為顏行步拜起何以為容坐卧念之何以為心引鏡窺影何以施眉目舉措建功何以為人惜乎棄休令之嘉名造梟鵠之逆謀捐傳世之慶祚招破敗之重災高論堯舜之道不忍桀紂之性生為世笑死為愚鬼不亦哀乎伯通與耿俠遊俱起佐命同被國恩俠游謙讓屢有降挹之言而伯通自伐以為功高天下往時遼東有豕生子白頭異而獻之行至河東見羣豕皆白懷慚而還若以予之功論於朝

廷則為遼東豕也今乃愚妄自比六國六國之時其勢
各盛廓土數千里勝兵將百萬故能據國相持多厯年
世今天下幾里列郡幾城柰何以區區漁陽而結怨天
子此猶河濱之人捧土以塞孟津多見其不知量也方
今天下適定海內願安士無賢不肖皆樂立名於世而
伯通獨中風狂行走自損盛時內聽嬌婦之失計外信讒
邪之諛言長為羣后惡法永為功臣鑒戒豈不誤哉定
海內者無私讎勿以前事自誤願留意顧老母少弟凡

舉事無為親厚者所痛而為見讎者所快

後漢書○俠游耿況字年

世一作年所自誤一作自疑○選注引或本云永為羣后惡志令檢范曄後漢書有此一句東觀漢記亦載此

書大意雖同辭旨全別蓋錄事者取舍詳畧矣

上光武請救二郡書

時彭寵攻浮急涿州太守張豐亦反二郡畔戾北州

憂恐上但遣游擊將軍鄧隆陰助浮浮懼帝急於救乃上疏詔報浮後寵豐果並自敗

昔楚宋列國俱為諸侯莊王以宋執其使遂有投袂之師魏公子顧朋友之要觸冒強秦之鋒夫楚魏非有分職匡正之大義也莊王但為爭強而發忿公子以一言

而立信耳今彭寵反叛張豐逆節以為陛下必棄捐它
事以時滅之既歷時月寂漠無音從圍城而不救放逆
虜而不討臣誠惑之昔高祖聖武天下既定猶身自征
伐未嘗寧居陛下雖興大業海內未集而獨逸豫不顧
北垂百姓遑遑無所繫心三河冀州曷足以傳後哉今
秋稼已熟復為漁陽所掠張豐狂悖姦黨日增連年拒
守吏士疲勞甲冑生蟣蝨弓弩不得弛上下焦心相望
救護仰希陛下生活之恩

光武詔報朱浮

往年赤眉跋扈長安吾策其無穀必東果來歸降今度此反虜勢無久全其中必有內相斬者今軍資未充故須候麥耳

論牧守易代疏

帝以二千石長吏多不勝任時有微過必見斥罷交易紛擾會

有日食之異浮為執金吾上疏自後牧守易代頗簡

臣聞日者衆陽之所宗君上之位也凡居官治民據郡典縣皆為陽為上為尊為長若陽上不明尊長不足則

千動三光垂示王者五典紀國家之政鴻範別災異之
文皆宣明天道以徵來事者也陛下哀憐海內新罹禍
毒保宥生人使得蘇息而今牧人之吏多未稱職小違
理實輒見斥罷豈不粲然黑白分明哉然以堯舜之盛
猶加三考大漢之興亦累功效吏皆積久養老於官至
名子孫因為氏姓當時吏職何能悉理論議之徒豈不
誼譁蓋以為天地之功不可倉卒艱難之業當累日也
而間者守宰數見換易迎新相代疲勞道路尋其視事

日淺未足昭見其職既加嚴切人不自保各相顧望無
自安之心有司或因睚眦以騁私怨苟求長短求媚上
意二千石及長吏迫於舉劾懼於刺譏故爭飾詐偽以
希虛譽斯皆羣陽騷動日月失行之應夫物暴長者必
夭折功卒成者必亟壞如摧長久之業而造速成之功
非陛下之福也天下非一時之用也海內非一旦之功
也願陛下遊意于經年之外望化于一世之後天下幸
甚

論牧守易代疏

舊制州牧奏二千石長吏不任位者皆先下三公案驗帝時用

明察不復委任三府權歸刺舉之吏浮復上疏

陛下清明履約率禮無違自宗室諸王外家后親皆奉
遵繩墨無黨執之名至或乘牛車齊於編人斯固法令
整齊下無作威者也求之於事宜以和平而災異猶見
者而豈徒然天道信誠不可不察竊見陛下疾往者上
威不行下專國命即位以來不用舊典信刺舉之官黜
鼎輔之任至於有所劾奏便加免退覆案不關三府罪

譴不蒙澄察陛下以使者為腹心而使以從事為耳目是為尚書之平決於百石之吏故羣下苛刻各自為能無以私情容長憎愛在職皆競張空虛以要時利故有罪者心不厭服無咎者坐被空文不可經盛衰貽後王也夫事積久則吏自重吏安則人自靜傳曰五年再閏天道乃備夫以天地之靈猶五載以成其化況人道哉臣浮愚慙不勝惓惓願陛下留心千里之任省察偏言之奏

請廣太學博士書

浮時轉太僕以國學
既興宜廣博士之選

夫太學者禮義之宮教化所由興也陛下尊敬先聖垂
意古典宮室未飾干戈未休而先建太學造立橫舍比
日車駕親臨觀饗將以弘時雍之化顯勉進之功也尋
博士之官為天下宗師使孔聖之言傳而不絕舊事策
試博士必廣求詳選爰自畿夏延及四方是以博舉明
經唯賢是登學者精勵遠近同慕伏聞詔書更試五人
唯取見在洛陽城者臣恐自今以往將有所失求之密

邇容或未盡而四方之學無所勸樂凡策試之本貴得其真非有期會不及遠方也又諸所徵試皆私自發遣非有傷費煩擾於事也語曰中國失禮求之於野臣浮幸得與講圖讖故敢越職

乘輿綬奏

漢名臣奏

車府丞宏受詔作乘輿綬五采何多黃也可更用赤絲為地

百官綬奏

博物志

百官皆帶王莽時綬又不齊因前袁安故綬工李涉等
六家所織綬不能具丙丁文能如組狀募能為丙丁文
謹圖畫一綬丙丁制度賜縑五十疋令王莽時六安都
尉留應募能為丙丁文謹處武庫給食留晝夜思念諷
誦狂癡三十日病愈今又以成請賜縑五十疋

彭寵

字伯通南陽宛
人封建忠侯

告城門將軍記

寵與朱浮相攻詔徵寵不行光武遣寵從弟
子后蘭卿諭之寵留子后蘭卿遂發兵反自

立為燕王齋獨在便室蒼頭子密等因寵卧
縛著牀呼其妻解寵手使作記并斬頭置囊
中持記馳出城詣闕封
子密等三人為不義侯

今遣子密等至子后蘭卿所速開門出勿稽留之

後漢書○

寵死共立子午子后蘭卿為
將午為其下所殺降祭遵

董宣

字少平陳留圉
人仕終洛陽令

移賊夏喜等書

江夏有劇賊夏喜等寇亂郡境以宣為江
夏太守到界移書喜等聞懼即時降散

朝廷以太守能禽姦賊故辱斯任今勒兵界首檄到幸

思自安之宜

後漢書

宋均

字叔庠南陽安衆人仕至尚書令

移記屬縣

均建武末為九江太守郡多虎暴常募設檻
穽均到下記屬縣其後傳言虎相與渡江

夫虎豹在山龜鼉在水各有所託今江淮之有猛獸猶
北土之有雞豚也今為民害咎在殘吏而勞勤張捕非
憂恤之本也其務退姦貪思進忠善可一去檻穽除削

課制

後漢書○均記宣書原屬教令以
其名近附之與前薛宣等書相類

同前

風俗通辨虎渡
為非實載均記

夫虎豹在山黿鼉在淵物性之所託故江淮之間有猛
獸猶江北之有雞豚今數為民害者咎在貪殘居職使
然而反逐捕非政之本也壞檻穽勿復課錄退貪殘進
忠良

下山娶書

均為九江太守浚遼縣有唐后二山
人共祠之衆巫遂取百姓男女以為

公姬歲歲改易既而不
敢嫁娶均下書乃絕

自今以後為山娶者娶巫家勿擾良民

嚴光

字子陵本姓莊一名遵會稽餘姚人少與光武同游學及即位遣使聘之三反而後至除

諫議大夫不屈隱富春山
○漢明帝名莊史諱為嚴

報侯霸書

霸字君房河南密人
歷大司徒封關內侯

霸與光素舊霸為大司徒遣使奉書使人因
謂光曰公聞先生至區區欲即詣造迫於典
司是以不獲願因日暮自屈語言光不荅乃
投札與之口授云云霸得書封奏之光武笑
曰狂奴
故態也

君房足下位至鼎足甚善懷仁輔義天下悅阿諛順旨

要領絕

後漢書○皇甫謐高士傳云霸與光素有舊使
西曹屬侯子道奉書光不起於牀上箕踞抱膝

發書讀訖問子道曰君房素癡今為三公寧小差否子道曰位已鼎足不癡也光曰遣卿來何言子道傳霸言光曰卿言不癡是非癡語乎天子徵我三乃來人主尚不見當見人臣乎子道求報光曰我手不能書乃口授之使者嫌少可更足光曰買菜乎求益也


陳留吏

牘上書

東觀漢記建武時天下墾田多不實詔覆檢覈百姓嗟怨光武見陳留吏牘上

有書時明帝為東海公在幄後言曰河南帝城多近臣南陽帝鄉多近親田宅踰制不可為准也帝詰吏首服因遣謁者考知奸狀

潁川弘農可問河南南陽不可問



東漢文紀卷七